

四庫全書

子部

欽定四庫全書

子部

冊府元龜卷五百四十一

詳校官中書臣丁榮祚

侍讀臣孫球覆勘

總校官庶吉士臣何思鈞

校對官中書臣張九鐔

謄錄監生臣朱學濂

欽定四庫全書

冊府元龜卷五百四十

宋 王欽若等撰

諫諍部

直諫第七

吳賀邵為中書令時孫皓克暴驕矜政事日弊邵上疏
諫曰古之聖王所以潛處重闈之內而知萬里之情垂
拱衽席之上明照八極之際者任賢之功也陛下以至
德淑姿統承皇業宜率身履道恭奉神器旌賢表善以

康庶政自頃年以來朝列紛錯真偽相貿上下空任文武曠位外無山嶽之鎮內無拾遺之臣佞諛之徒拊翼天飛干弄朝威盜竊榮利而忠良排墜信臣被害是以正士推方而庸臣苟媚先意承指各希時趨人執反理之評士吐詭道之論遂使清流變濁忠臣結舌陛下處九天之上隱百重之室言出風靡令行景從親洽寵媚之臣日聞順意之辭將謂此輩實賢而天下已平也臣心所不安敢不以聞臣聞興國之君樂聞其過荒亂之

主樂聞其譽聞其過過日消而福臻聞其譽譽日損而
禍至是以古之人君揖讓以進賢虛已以求過譬天位
於乘犇以虎尾為警戒至於陛下嚴刑法以禁直辭黜
善士以逆諫臣眩曜毀譽之實沉淪近習之言昔高宗
思佐夢寐得賢而陛下求之如忘忽之如遺故常侍王
蕃忠恪在公才任輔弼以醉酒之間加之大戮近鴻臚
葛奚先帝舊臣偶有逆忤昏醉之言耳三爵之後禮所
不諱陛下猥發雷霆謂之輕慢飲之醇酒中毒隕命自

是之後海內悼心朝臣失圖仕者以退為幸居者以出為福誠非所以保光洪緒熙隆道化也又何定本趨走小人僕隸之下身無錙銖之行能無鷹犬之用而陛下愛其佞媚假其威柄使定恃寵放恣自擅威福口正國議手弄天機上虧日月之明下塞君子之路夫小人求入必進姦利定間妄興事役發江邊戍兵以驅麋鹿結置山陵芟夷林莽殫其九野之獸聚於重闈之內上無益時之分下有損耗之費而兵事罷於運送人力竭於

驅逐老弱饑凍大小怨歎臣竊觀天變自比年以來陰陽錯謬四時逆節日食地震中夏隕霜參之典籍皆陰氣凌陽小人弄勢之所致也臣嘗觀覽書傳驗諸行事蓄祥之應所為寒慄昔高宗修己以消鼎雉之異宗景崇德以退熒惑之變願陛下上懼皇天譴告之誚下追二君禳蓄之道遠覽前代任賢之功近寤今日謬授之失清澄朝位旌叙俊乂放退佞邪抑奪姦勢如是之革一勿復用廣延淹滯容受直辭祇承乾旨敬奉先業則

大化光敷天人望塞也傳曰國之興也視民如赤子其
亡也以民為草芥陛下昔韜神光潛德東夏以聖哲茂
姿龍飛應天四海延頸八方拭目以成康之化必隆於
旦夕也自登位以來法禁轉苛賦調益繁中宮內監分
布州郡橫興事役競造姦利百姓罹杼軸之困黎民罷
無已之求老幼饑寒家戶菜色而所在長吏迫畏罪負
嚴刑峻法苦民求辦是以人力不堪家戶離散呼嗟之
聲感傷和氣又江邊戍兵遠當以拓土廣境近當以守

界備難宜時優育以待有事而徵發賦調煙至雲集衣不全裋褐食不贍朝夕出當鋒鏑之難入抱無聊之感是以父子相棄叛者成行願陛下寬賦除煩賑恤窮乏省諸不急濫禁約法則海內樂業大化普洽矣夫民者國之本食者民之命也今國無一年之儲家無經月之蓄而後宮之中坐食者萬有餘人內有離曠之怨外有損耗之費使庫廩空於無用士民饑於糟糠又北敵注目伺國盛衰陛下不恃已之威德而怙敵之不來忽四

海之困窮而輕虜之不為難誠非長策廟勝之要也昔
太皇帝勤身苦體創基南夏割據江山拓土萬里雖承
天贊實繇人力也餘慶遺祚至於陛下宜勉崇德器以
光前烈愛民養士保全先軌何可忽顯祖之功勤輕難
得之大業忘天下之不振替興衰之巨變哉臣聞否泰
無常吉凶繇人長江之限不可久恃苟我不守一葦可
航也昔秦建皇帝之號據殽函之阻德化不脩法政苛
酷毒流生民忠臣杜口是以一夫大呼社稷傾覆近劉

氏據三關之險守重山之固可謂金城石室萬世之業
任授失人一朝喪沒君臣係頸共為羈僕此當世之明
鑒目前之儆戒也願陛下遠考前事近覽世變豐基強
本割情從道則成康之治興而聖祖之祚隆矣書奏皓
深恨之

晉秦秀為博士時王濬有平吳之勲而為王渾所譖毀
武帝雖不從無明賞罰以濬為輔國大將軍天下咸為
之怨秀上言曰自大晉啓祚輔國之號率以舊恩此為

王濬無功之時受九列之顯位立功之後更得寵人之
辱號也四海視之孰不失望蜀小吳大平蜀之後二將
皆就加三事今濬還而降等天下安得不惑乎吳之未
亡也雖以三祖之神武猶躬受其屈以孫皓之虛名足
以驚動諸夏每一小出雖聖心知其垂亡然中國輒懷
惶怖當爾時有能借天子百萬之衆平而有之與國家
結兄弟之交臣恐朝野寔皆甘之耳今濬舉蜀漢之卒
數旬而平吳雖舉吳人之財寶以與之本非已分有焉

而遽與計較乎

武帝會朝臣立議齊王攸當之藩尚書左僕射散騎常侍王渾上書諫曰伏承聖詔憲章古典進齊王攸為上公崇其禮儀遣攸之國昔周氏建國大封諸姬以藩帝室永世作憲至於公旦武王之弟左右王事輔濟大業不使歸藩明至親議著不可遠朝故也是故周公得以聖德光弼幼主忠誠著於金縢光述文武仁聖之德攸於大晉姬旦之親也宜贊皇朝與聞政事實為陛下腹

心不二之臣且攸為人修潔義信加以懿親志存忠貞
今陛下出攸之國假以都督虛號而無典戍幹方之實
去離天朝不豫王政傷母弟至親之休虧友于歎篤之
義懼非陛下追述先帝文明太后待攸之宿意也若以
攸望重於事宜出者今以汝南王亮代攸亮宣皇帝子
文皇帝弟由駿各處方任在內外之資論以後慮亦不
為輕攸今之國適足長異同之論以損仁慈之美耳而
今天下窺陛下有不崇親親之情臣竊為陛下不取也

若以后妃外親任以朝政則有王氏傾漢之權呂產專朝之禍若以同姓至親則有吳楚七國逆亂之殃歷觀古今苟事輕重所在無不為害也不可事事曲設隄防慮方來之患者也唯當任正道而求忠良若以智計猜物雖親見疑至於疏遠者亦何能自保乎人懷危懼非為安之理此最有國家者之深忌也愚以為太子太保缺宜留攸居之與太尉汝南王亮衛將軍王珣共為保傅幹理朝事三人齊位足相持正進有輔納廣義之益

退無偏重相傾之勢今陛下有篤親親之恩使攸蒙仁覆之惠臣同國休戚義在盡言心之所見不能嘿已私慕魯女存國之志敢陳愚見觸犯天威欲陛下事每盡善冀萬分之助臣而不言誰當言者帝不納

庾粲為博士齊王攸之就國也下禮官議崇錫之物粲與大叔廣劉暉繆蔚郭頤秦秀傅珍等上表諫曰書稱帝堯克明峻德以親九族武王先有天下兄弟之國十有六人同姓之國四十人元勳睦親顯以殊禮而魯衛

齊晉大啟土宇並受分器所謂惟善所在親疏一也大
晉龍興隆唐周之遠跡王室親屬佐命功臣咸受爵土
而四海乂安今吳會已平詔大司馬齊王出統方嶽當
遂撫其國家將準古典以垂永制昔周之選建明德以
左右王室也則周公為太宰康叔為司寇聃季為司空
及召芮畢毛諸國皆入居公卿大夫之位明股肱之任
重守地之位輕也未聞古典以三事之重出之國者漢
氏諸侯王位尊勢重在丞相三公上其入贊朝政者乃

有兼官其出之國亦不復假台司虛名為隆寵也昔申
無宇曰五大不在邊先儒以為貴寵公子公孫累世正
卿也又曰五細不在庭先儒以為賤妨貴少陵長遠間
親新間舊小加大也不在庭不在朝廷為政也又曰親
不在外羈不在內今棄疾在外鄭丹在內君其少戒之
叔向有言公室將卑其枝葉先落公室公族之本而去
之諺所謂比焉而縱尋斧柯者也今使齊王賢邪則不宜
以母弟之親尊居魯衛之常職不賢邪不宜大啓土宇

表建東海也古禮三公無職坐而論道不聞以方任嬰
之惟周室大壞宣王中興四夷交侵救急朝夕然後命
召穆公征淮夷故其詩曰徐方不回王曰旋歸宰相不
得久在外也今天下已定六合為家將數延三事與論
太平之基而更出之去王城二千里違舊章矣粵草議
先以呈父純純不禁太常鄭默博士祭酒曹志並過其
事武帝以博士不答所問答所不問大怒粵等並除名
又博士秦秀等以為齊王宜輔內朝政不可之藩祭酒

曹志魏曹植之子嘗恨其父不得志於魏因愴然嘆曰
安有如此之才如此之親不得樹木助化而遠出海隅
晉朝之隆其殆乎哉乃奏議曰伏聞大司馬齊王當出
藩東夏備物盡禮同之二伯今陛下為聖君稷契為賢
臣內有魯衛之親外有齊晉之輔坐而守安此萬世之
基也古之夾輔王室同姓則周公其人也異姓則太公
其人也皆身在內五世反葬後雖有五霸代興桓文譎
主下有請隧之僭上有九錫之禮終於譎而不正驗於

尾大不掉豈與召公之歌棠棣周詩之詠鷓鴣同日論
哉今聖朝創業之始始之不諒後事難工幹植不强枝
葉不茂骨體不存皮膚不充自義皇以來豈是一姓之
獨有欲結其心者當有磐石之固夫欲享萬世之利者
當與天下議之故天聰明自我人聰明秦魏欲獨擅其
威而財得沒其身周漢能分其利而親疎為之用此自
聖王之深慮日月之所照事雖淺當深謀之言雖輕當
重思之志備位儒官若言不及禮是志寇竊知忠不言

議所不敢志以為當如博士等議議成當上見其從弟高邑公嘉嘉曰兄議甚切百年之後必書晉史目下將見責邪帝覽議大怒曰曹志尚不明吾心况四海乎以議者不指答所問橫造異論策免太常鄭默於是司奏收志等結罪詔惟免志官以公還第

裴頡為左僕射侍中惠帝時以陳準子康韓蔚子嵩並侍東宮頡諫曰東宮之建以儲皇極其所與遊接必簡英俊宜用成德康嵩幼弱未識人理立身之節東宮實

體夙成之表而今有童子侍從之聲未是光闈遐風之
弘理也

閻纘為西戎校尉愍懷太子之廢也纘輿棺詣闕上書
理太子之寃曰伏見赦文及榜下前太子適手疏以為
驚愕自古以來臣子悖逆未有如此之甚也幸賴天慈
全其首領臣伏念適生於聖父而至此者由於長養深
宮沉淪富貴受饒先帝父母驕之每見選師傅下至羣
吏率取膏粱擊鐘鼎食之家希有寒門儒素如衛綰周

文石奮䟽廣洗馬舍人亦無汲黯鄭莊之類遂使不見
事父事君之道臣案古典太子居以士禮與國人齒以
此明先王欲令知先賤然後乃貴自頃東宮亦微太盛
所以致敗也非但東宮歷觀諸王師友文學皆豪族力
能得者率非龔遂王陽能以道訓友無亮直三益之節
官以文學為名實不讀書但共鮮衣好馬縱酒高會嬉
遊博奕豈有切磋能相長益臣嘗恐公族陵遲以此歎
息今適可以為戒恐其被斥棄逐遠郊始當悔過無所

復及昔戾太子無狀稱兵距命而壺關三老上書有田
千秋之言猶曰子弄父兵罪應笞耳漢武感悟築思子
之臺今適無狀言語悖逆受罪之日不敢失道猶為輕
於戾太子尚可禁持重選保傅如司空張華道德深遠
乃心忠誠以為之師光祿大夫劉寔寒苦自立終始不
衰年同呂望經籍不廢以為之保尚書僕射裴頠明允
恭肅體道居正以為之友置游談文學皆選寒門孤官
以學行自立者及取服勤更事涉履艱難事君事親名

行素聞者使與共處使嚴御史監護其家絕貴戚子弟
輕薄賓客如此左右前後莫非正人師傅文學可令十
日一講使共論議於前勅使但道古今孝子慈親忠臣
事君及思愆改過之義皆聞善道庶幾可全昔太甲有
罪放之三年思庸克復為殷明王又魏文帝懼於見廢
夙夜自祇竟能自全及至明帝因母得罪廢為平原侯
為置家臣庶子師友之學皆取正人共相規矯兢兢慎
罰事父以孝父沒事母以謹聞於天下于今稱之漢高

皇帝數置酒於庭欲廢太子後四皓為師子房為傅竟
復成就前事不忘後事之戒孟軻有云孤臣孽子其操
心也危其慮患也深故多善功李斯云慈母多敗子嚴
家無格虜繇陛下驕適使至於此庶其受罪以來足自
思改方今天下多虞四夷未寧將伺國隙儲副大事不
宜空虛宜為大計小復停留先加嚴誨依平原侯故事
若不悛改棄之未晚也臣素寒賤無力仕官不經東宮
情不私適念昔楚國處女諫其王曰有龍無尾言年四

十未有太子臣嘗備近職雖未能自結天日情同閭寺
慳慳之誠皆為國計臣老母見臣為表乃為臣卜卦云
書御即死妻子守臣涕泣見止臣獨以為頻見拔擢嘗
為近職此恩難忘何以報德唯當陳誠以死獻忠輒具
棺絮伏須刑誅書奏御不省皇太孫立纘復上疏曰臣
前上書訟太子之枉不見省覽昔壺關三老陳衛太子
之寃而漢武築思子之臺高廟令田千秋上書不敢正
言託以鬼神之教而孝武大感月中三遷位至丞相乘

車入殿號曰車氏恨臣精誠微薄不能有感竟使太子
流離沒命許昌向令陛下即納臣言不至此禍天贊聖
意三公獻謀庶人賜死罪人斯得太子以明臣恨其晚
無所復及詔書慈悼迎喪反葬復其禮秩誠副衆望不
意呂霍之變復生於今日伏見詔書建立太孫斯誠陛
下上順先典以安社稷中慰慈悼冤魂之痛下令萬國
心有所繫追惟庶人所為無狀幾傾宗廟賴相國太宰
至忠憤發潛謀俱斷奉贊聖意以成神武雖周誅二叔

漢掃諸呂未足以喻臣願陛下因此大更釐改以為永
制禮置太子居以士禮與國人齒為置官屬皆如朋友
不為純臣既使上厭至望以崇孝道又令不相嚴憚易
相規正昔漢武既信姦讒危害太子復用望氣之言欲
盡誅詔獄中囚邴吉以皇孫在焉閉門距命後遂擁護
皇孫督罰乳母卒至成人立為孝宣皇帝苟志於忠無
往不可歷觀古人雖不避死亦由世教寬以成節雖距
詔書事在於忠故宥而不責自晉興以來用法太嚴遲

速之間輒加誅斬一身伏法猶可強為今世之誅動輒
滅門昔呂后臨朝肆意無道周昌相趙三召其王而昌
不遣先徵昌入後復召王此繇漢制本寬得使為快假
令如今呂后必謂昌已反夷其三族則誰敢為殺身成
義者哉此法宜改可使經遠又漢初廢趙王張敖其臣
貫高謀殺高祖高祖不誅以明臣道田叔孟舒十人為
奴髡鉗隨王隱親侍養故令平安向使晉法得容為義
東宮之臣得如周昌固護太子得如邴吉距詔不坐伏

死諫諍則聖意必變太子以安如田叔孟舒侍從不罪者則隱親左右姦凶毒藥無緣得設太子不夭也臣每責東宮臣故無侍從者後聞頗有人於道路望車拜辭而有司收付雒陽獄奏科其罪然臣固莫從良有以也又本置三率盛其兵馬所以宿衛防虞而使者卒至莫有警嚴覆請審者此由恐畏滅族今皇孫冲幼世事多故若有不虞強臣專制姦邪矯詐雖有相國保訓東宮擁佑之恩同於郅吉適可使玉體安全宜開來防可著

于令自今以後諸有廢興倉卒羣臣皆得輒嚴須錄詣
殿前面受口詔然後為信得同周昌不遣王節下聽臣
子隱親得如田叔孟舒不加罪責則永固儲副以安後
嗣之遠慮也來事難知往事可改臣前每見詹事裴權
用心懇惻舍人秦戢數上疏啓諫而爰倩贈以九列權
有忠意獨不蒙賞謂宜依倩為比以寵其魂推尋表疏
知秦戢輩及司隸所奏諸敢拜辭於道路者明詔稱揚
使微異於衆以勸為善以獎將來也續又陳今相國雖

已保傳東宮保其安危至於旦夕訓誨輔導出入動靜
劬勞宜選寒苦之士忠貞清正老而不衰如城門校尉
梁柳白衣南安朱冲比者以為師傅其侍臣以下文武
將吏且勿復取盛戚豪門子弟若吳太妃家室及賈郭
之黨如此之輩生而富溢無念脩己率多輕薄浮華相
驅放縱皆非所補益少主者也皆可擇寒門篤行學問
素士更履險易節義足稱者以備羣臣可輕其禮儀使
與古同於相切磋為益昔魏文帝之在東宮徐幹劉楨

為友文學相接之道並如氣類吳太子登顧譚為友諸
葛恪為賓臥同床帳行則參乘刪交如布衣相呼以字
此則近代之明比也天子之子不患不富貴不患人不
敬畏患於驕盈不聞其過不知稼穡之艱難耳至於甚
者乃不知名六畜可不勉哉昔周公親撻伯禽曹參答
蜜二伯聖考慈父皆不傷恩今不忍小相維持令至闕
失頓相罪責不亦誤哉在禮太子朝夕視膳昏定晨省
跪問安否於情得盡五日一朝於敬既簡於恩亦疏易

致構間故曰一朝不朝其間容刀五日之制起漢高祖
身為天子父猶庶人萬幾事多故闕私敬耳今主上臨
朝太子無事專主孝養宜改此俗文王世子篇曰王季
一飯亦一飯再飯亦再飯安有逸豫五日一覲哉纘又
陳令迎太子神柩孤魂獨行太孫幼冲不可涉道謂可
遣妃奉迎遠路令其父行隨行衛護皇太子初見誣陷
臣家門無祐三世假親具嘗辛苦以家觀國固知太子
有變臣故求副監國欲依邴吉故事距違來使供養擁

護身親飲食醫藥冀足救危主者以臣名資輕淺不肯見與世人見笑謂為此職進退難居有必死憂臣獨以為苟全儲君賈氏所誅甘心所願今監國御史直副皆當三族侍衛無狀實自宜然臣謂其小人不足具責故曾子曰可以託六尺之孤臨大節而不可奪是以聖王慎選故河南尹向雄昔能犯難定故將鍾會文帝嘉之始拔顯用至於先帝以為右率如間之事若得向雄之比則豈可觸哉此二使者但為愚怯亦非與謀但可誅

身自全三族如郭倣郭斌則於刑為當又東宮亦宜妙
選忠直亮正如向雄比陛下千秋萬歲之後太孫幼冲
選置兵衛宜得柱石之士如周昌者世俗淺薄士無廉
節賈謚小兒恃寵恣睢而淺中弱植之徒更相翕習故
世號魯公二十四友又謚前見臣表理太子曰閻兒作
此為健然觀其意欲與諸司馬家同皆為臣寒心伏見
詔書稱明滿奮樂廣侍郎賈肩與謚親理而亦疏
遠往免父喪之後停家五年雖為小屈有識貴之

潘岳繆徽等皆謚父黨共相沉浮人士羞之聞其晏然
莫不為怪今詔書暴揚其罪竝皆遣出百姓咸云清當
臣獨謂非但岳徽二十四人宜皆齊絀以肅風教朝廷
善其忠烈擢為漢中太守

顧榮為元帝丞相軍司散騎常侍凡所謀畫皆以諮焉
榮既南州望士躬處右職朝野甚推敬之時帝所幸鄭
貴嬪有疾以祈禱頗廢萬幾榮上疏諫曰昔文王父子
兄弟乃有三聖可謂窮理者也而文王日昃不暇殮周

公一沐三握髮何哉誠以一日萬幾不可不理一言蹉
跌患必及之故也當今衰季之末屬亂離之運而天子
流播豺狼塞路公宜露營野次星言夙駕伏軾怒蛙以
募勇士懸膽於庭以表辛苦貴嬪未安藥石實急禱祀
之事誠復可脩豈有便塞參佐白事斷賓客問訊令強
賊臨境流言滿國人心萬端去就紛紜願冲虛納下廣
延俊彥思畫今日之要塞鬼道淫祀弘九合之勤雪天
下之恥則羣生有賴開泰有期矣

丁潭為元帝丞相西閣祭酒稱制使各陳時事損益潭
上書曰為國者恃人須才蓋二千石長吏是也安可不
明簡其才使必允當既得其人使久於其職在官者無
苟且居下者有常心此為政之較也今之長吏遷轉既
數有送迎之費古人三載考績三考黜陟中才處局故
難以速成夫兵所以防禦未然鎮塞姦凶周雖三聖功
成由武今戎戰之世益宜留心簡選精銳以備不虞無
事則優其身有難則責其力竊聞今之兵士或私有役

使而營事不充夫為國者猶為其家也計財力之所任
審取舍之舉動不營難成之功損棄分外之役今兵人
未彊尚審其宜經塗遠舉未獻大捷更使力殫財盡而
威望挫弱也

熊遠為御史中丞元帝時冬雷電且大雨帝下書責躬
引過遠上疏曰被庚午詔書以雷電大震暴雨非時深
自克責雖禹湯罪己未足以喻臣闇於天道竊以人事
論之陛下節儉敦朴愷悌流惠而王化未興者羣公卿

士不能夙夜在公以益大化素殮負乘糝穢明時之責也今逆賊猾夏暴虐滋甚二帝幽殞梓宮未反四海延頸莫不東望而未能遣軍北討讎賊未報此一失也昔齊侯既敗七年不飲酒食肉况此耻尤大是臣子之責宜在枕戈為王前驅若此志未果者當上下克儉恤人養士徹樂減膳惟脩戎事陛下憂勞於上而羣官未同戚容於下每有會同務在調戲酒食而已此二失也選官用人不料實德惟在白望不求才幹鄉舉道廢請託

交行有德而無力者退脩望而有助者進稱職以違俗
見譏虛資以從容見貴是故公正道虧私塗日開強弱
相陵冤枉不理今當官者以理事為俗吏奉法為苛刻
盡禮為諂諛從容為高妙放蕩為達士驕蹇為簡雅此
三失也世所謂三失者公法加其身私議貶其非轉見
排退陸沈泥滓時所謂三善者王法所不加清論羨其
賢漸相登進士不輟官攀龍附鳳翱翔雲霄遂使世人
削方為圓撓直為曲豈待顧道德之清塗踐仁義之區

域乎是以萬幾未整風俗偽薄皆此之由不明其黜陟以審能否則此俗未可得而變也今朝廷羣司以從順為善相違見貶不復論才之曲直言之得失也時有言者或不見用是以朝少辨諍之臣士有祿仕之志焉郭翼上書武帝擢為屯留令又置諫官所以從受直言誘進將來故人得自盡言無隱諱任官然後爵之位定祿之數奏以言明試以功車服以庸舜猶歷試諸難而今先祿不試甚違古義亂之所由也求才急於䟽賤用

刑先於親貴然後令行禁止野無遺滯堯取舜於側陋
舜拔賢於巖穴姬公不曲繩於天倫叔向不虧法於孔
懷今朝廷法吏多出於寒賤是以章書日奏而不足以
懲物官人選才而不足以濟事宜招賢良於屠釣聘耿
介於丘園若此道不改雖并官省職無救弊亂也能哲
而惠何憂乎驩兜何遷乎有苗何畏乎巧言令色孔壬
此官得其人之益也

郭璞為尚書郎永昌元年皇孫生璞上疏曰有道之君

未嘗不以危自持亂世之主未嘗不以安自居故存而
不忘亡者三代之所興也亡而自以為存者末世之所
廢也是以古之令主開納忠諫以弼其違標顯切直用
攻其短乃至聞一善則拜見規誠則懼何者蓋不私其
身處天下以至公也臣竊惟陛下符運至著勳業至大
而中興之祚不隆聖敬之風未躋者殆由法令太明刑
教太嚴故水至清則無魚政至察則衆乖此自然之勢
也臣去春啟事以圜圉充斥陰陽不和推之卦理宜因

郊祀作赦以蕩滌瑕穢不然將來必有愆陽苦雨之蓄
摧震薄蝕之變狂狡蠢戾之妖其後月餘日果薄鬪去
秋以來諸郡並有暴雨水皆洪潦歲用無年適聞吳興
復欲有搆妄者咎徵漸成臣甚惡之頃者以來役賦轉
重獄犴日結百姓困擾甘亂者多小人愚險共相扇動
雖勢無所至然不可不虞案洪範傳君道虧則日蝕人
憤怨則水涌溢陰氣積則下代上此徵理潛應已著實
於事者也假令臣遂不幸諤中必貽陛下側席之憂今

皇孫載育天固靈基黔首顙顙實望惠潤又歲涉午位
金家所忌宜於此時崇恩布澤則火氣潛消苗藺不生
矣陛下上承天意下順物情可因皇孫之慶大赦天下
然後明罰勅法以肅理官克厭天心慰塞人事兆庶幸
甚禎祥必臻矣臣今所陳暫而省之或未允聖旨久而
尋之終亮臣誠若所啓上合願陛下勿以臣身廢臣之
言臣言無隱而陛下納之適所以顯君明臣直之義耳
疏奏納焉即大赦改年時暨陽人任谷因耕息於樹下

忽有一人著羽衣就滛之既而不知所在谷遂有娠積月將產羽衣人復來以刀穿其陰下出一蛇子便去谷遂成宦者後詣闕上書自云有道術帝留谷宮中璞復上疏曰任谷所為妖異無有因由陛下玄鑒廣覽欲知其情狀引之禁內供給安處臣聞為國以禮正不聞以邪所聽惟人故神降之吉陛下簡默居正動遵典刑按周禮奇服怪人不入宮况谷妖詭恠人之甚者而登講肆之堂密邇殿省之側塵點日月穢亂天聽臣之私情

竊所不取也陛下若以谷信為神靈所憑者則應敬而
遠之夫神聰明正直接以人事若以谷為妖蠱詐妄者
則當投彼裔土不宜令褻近紫闈若以谷或是神祇告
譴為國作青者則當克己修禮以弭其妖不宜令谷安
然自容肆其邪變也臣愚以為陰陽陶蒸變化萬端亦
是狐狸魍魎憑假作慝願陛下採臣愚懷特遣谷出臣
以人乏忝荷史任敢忘直筆惟義是規其後明帝即位
谷因亡走

孫霄為瑯琊國右常侍瑯琊悼王煥薨年一歲元帝悼
念不已營起園陵工役甚衆霄上疏諫曰臣聞法度典
制先王所重吉凶之禮事貴不過是以世豐不使奢放
凶荒必務約殺朝聘嘉會足以展庠序之儀殯葬送終
務以稱哀榮之節上無奢泰之謬下無匱竭之困故華
元厚葬君子謂之不臣嬴博至儉仲尼稱其合禮明傷
財害時古人之所譏節省簡約聖賢之所嘉也語曰上
之化下如風靡草京邑翼翼四方所則明教化法制不

可不慎也陛下龍飛踐祚興微濟弊聖懷勞謙務從簡
儉憲章舊制猶欲節省禮典所無而反尚飾此臣愚情
竊所不安也棺槨輿服旒翬之屬禮典舊制不可廢闕
凶門栢歷禮典所無天晴可不用遇雨則無益此至宜
節省者也若瑯琊一國一時所用不為大費臣在機近
義所不言今天臺所居王公百僚聚在都輦凡有喪事
皆當供給材木百數竹薄千計凶門兩表衣以細竹及
材木價值既貴又非表凶哀之宜如此過飾宜從粗簡

又按禮記國君之葬棺槨之間容柩大夫容壺士容甌以壺甌為差則柩財大於壺明矣槨周於棺槨不甚大也語曰葬者藏也藏欲其深而固也槨大則難為堅固無益於送終而有損於財力凶荒殺禮經國常典既減殺而猶過舊此為國之所厚惜也又禮將葬遷柩於廟祖而行及墓即窆葬之日即反哭而虞如此則柩不宿於墓上也聖人非不哀親之在上而無情於丘墓蓋以墓非安神之所故修虞於殯宮始則營草宮於山陵遷

神柩於墓側又非典也非禮之事不可以訓萬國臣至
愚至賤忽求革前之非可謂狂瞽不知忌諱然今天下
至弊自古所希宗廟社稷遠託江表半州之地彫殘以
甚加之荒旱百姓困瘁非但不足死亡是懼此乃陛下
至仁之所矜愍可憂之至重正是規矯末俗改張易調
之時而猶當竭已罷之人營無益之事殫已困之財修
無用之費此固臣之所不敢安也今瑯琊之於天下國
之最大若割損非禮之事務遵古典上以彰聖朝簡易

之至化下以表萬世無窮之規則此芻蕘之言有補萬
一塵露之微有增山海表寢不報

江道為吏部郎長兼侍中時穆帝將修後池起閣道道
上疏曰臣聞王者處萬乘之極享富有之大必顯明制
度以表崇高盛其文物以殊貴賤建靈臺濬辟雍立宮
館設苑囿所以弘皇上之尊彰臨下之義前聖創其禮
後代遵其矩當代之君咸營斯事周宣興百堵之作鴻
雁歌安宅之歡魯僖修泮水之宮採芹有思樂之頌蓋

上之有為非以予欲是盈下之奉上不以劬勞為勤此自古之令典軌儀之大式也夫理無常然三正相詭司牧之體與世而移致飾則素故資返於剝有大必盈則受之以謙損上益下順兆庶之悅享以二簋用至約之義是以唐虞流化於茅茨夏禹垂美於卑室過儉之陋非中庸之制然三聖行之以致至道漢高祖當營建之始怒宮庫之狀孝文處既富之世愛十家之產亦以播惠當時著稱來葉今者二虜未殄神州荒蕪舉江左之

衆經畧艱難漕揚越之粟北饋河雒兵不獲戢運戍悠
遠倉庫內罄百姓力竭加春夏以來水旱為害遠近之
收普減常年財傷人困大役未已軍國之用無所取給
方之往代豐弊相懸損之又損實在今日伏惟陛下聖
質天縱凝曠清虛闡日新之盛茂欽明之量無欲體於
自然冲素刑乎萬國韶既盡美則必盡善宜養以玄虛
守以無為登覽不以臺觀游豫不以苑沼偃息必於仁
義馳騁極於六藝觀巍巍之隆鑒二代之文仰味羲農

俯尋周孔其為逍遙足以尊道德之輔親縉紳之秀疇
咨以時顧問不倦獻替諷諫日日而聞則庶績惟凝六
合咸熙中興之盛邁於殷宗休嘉之慶流乎無窮昔漢
起德陽鍾離抗言魏營宮殿陳羣正辭臣雖材非若人
然職忝近侍言不足採而義在以聞帝嘉其言而止

孫綽字興公為散騎常侍領著作郎時大司馬桓溫欲
經緯中國以河南粗平將移都雒陽朝廷畏溫不敢為
異而北土蕭條人情疑懼雖竝知不可莫敢先諫綽上

疏曰伏見征西大將軍臣溫表便當躬率三軍討除二
寇蕩滌河渭清灑舊京然後神旂電舒朝服濟江反皇
居於中土正玉衡於天極斯超世之宏圖千載之盛事
然臣之所懷竊有未安以為帝王之興莫不藉地利人
和以建功業貴能以義平暴因而撫之懷愍不建淪胥
秦京遂令鮮卑交侵神州絕綱土分之釁誠由道喪然
中夏蕩蕩一時橫流百郡千城曾無完郭者何哉亦以
地不可守投奔有所故也天祚未草中宗龍飛非惟信

順協於天人而已實賴萬里長江畫而守之耳易稱王
公設險以守其國險之時義大矣哉斯已然之明效也
今作勝談自當任道而遺險較實量分不得不保小以
固存自喪亂以來六十餘年蒼生殄滅百不遺一河雒
丘墟函夏蕭條井堙木刊阡陌夷滅生理茫茫永無依
歸播流江表已經數世存者長子老孫亡者丘隴成行
雖北風之思感其素心目前之哀實為交切若遷都旋
輪之日中興五陵即復緬成遐域泰山之安既難以理

保烝烝之思豈不纏於聖心哉温今此舉誠欲大覽始
終為國遠圖向無山陵之急亦未首決大謀獨任天下
之至難也今發憤忘食忠慨亮到凡在有心孰不致感
而百姓震駭同懷危懼者豈不以反舊之樂賒而趨死
之憂促哉何者植根於江外數十年矣一朝拔之頓驅
踰於空荒之地提挈萬里踰險浮深離墳墓棄生業富
者無三年之糧貧者無一食之飯田宅不可復售舟車
無從而得捨安樂之國適習亂之鄉出必安之地就累

卯之危將頓仆道塗飄溺江川僅有達者夫國以人為
本疾寇所以為人衆喪而寇除亦安所取哉此仁者所
宜哀矜國家所宜慮也自古今帝王之都豈有常所時
隆則宅中而圖大勢屈則遵養以待會使德不可勝家
有三年之積然後始可謀太平之事耳今天時人事有
未至者矣一朝欲一宇宙無乃頓而難舉乎臣之愚計
以為且可更遣一將有威名資實者先鎮雒陽於陵所
築三壘以奉衛山陵掃平梁許清一河南運漕之路既

通然後盡力於開墾廣田積穀漸為徙者之資如此賊
見亡徵勢必遠竄如其迷逆不化復欲送死者南北諸
軍風馳電赴若身首之救痛癢率然之應首尾山陵既
固中夏小康陛下且端委紫極增修德政躬行漢文簡
樸之志去小惠節浮費審官人練甲兵以養士滅寇為
先十年行之無使隳廢則貧者殖其財怯者充其勇人
知天德赴死如歸以此致政猶運諸掌握何故捨百勝
之長理舉天下而一擲故陛下春秋方富溫克壯其猶

君臣相與弘勝德業括囊元吉豈不快乎今温倡高議
聖朝互同臣以輕微獨獻管見出言之難實在今日而
臣區區必聞天聽者竊以無諱之朝在瞽進說芻蕘之
謀聖賢所採所以不勝至憂觸冒干陳若陛下垂神温
少留思豈非屈於一人而允億兆之願哉如以干忤罪
大欲加顯戮使丹誠上達退受刑誅雖沒泉壤尸且不
朽桓温見綽表不悅曰致意興公何不尋君遂初賦知
人家國事邪

許榮為左領衛將軍時孝武帝以會稽王道子輔政朝政既紊榮上疏曰今臺府局吏直衛武官及僕隸婢兒取母之姓者本減獲之徒無鄉邑品第皆得命議用為郡守縣令竝帶職在內委事於小吏手中僧尼乳母競進親黨又受貨賂輒臨官領眾無衛霍之才而比方古人為患一也臣聞佛者清遠元虛之神以五戒為教絕酒不淫而今之奉者穢慢阿尼酒色是耽其違二矣夫致人於死未必手刃害之若政教不均暴濫無罪必天

天命其違三矣盜者未必躬竊人財江乙母失布罪由
令尹今禁令不明劫盜公行其違四矣在上化下必信
為本昔年下書勅使盡規而衆議兼集無所採用其違
五矣尼僧成羣依傍法服五戒粗法尚不能遵况精妙
乎而流惑之徒競加敬事又侵漁百姓取財為惠亦未
合布施之道也又陳太子宜出臨東宮尅獎德業疏奏
竝不省

聞人夷為博平令時孝武帝以會稽王道子輔政道子

既為皇太妃所愛時失禮敬帝不能平然以太平之故
加崇禮秩更上疏曰驃騎諮議叅軍茹千秋協附宰相
起自微賤竊弄威權銜賣天官其子壽齡為樂安令賊私
狼藉畏法奔逃竟無罪罰傲然還縣又尼姪屬傾動亂
時穀賤人饑寒流殍不絕繇百姓單貧役調深刻又振
武將軍庾恒鳴角京邑主簿戴良夫苦諫被囚殆至亡
命而恒以醉酒見怒良夫以執忠廢棄又權寵之臣各
開小府施置吏佐無益於官有損於國疏奏帝益不平

而逼於太妃無所廢黜

冊府元龜卷五百四十

欽定四庫全書

冊府元龜卷五百四十一 宋 王欽若等 撰

諫諍部

直諫第八

宋鄭鮮之初為宋國奉常赫連勃勃

南朝以教
救為佛佛

兵陷關

中高祖復欲北討行意甚盛鮮之上表諫曰伏思聖略
深遠臣之愚管無所厝其意然臣愚竊有所懷敵之凶
狡情狀可見自關中再敗皆是師徒違律非是內有事

故致外有敗傷虜聞殿下親御六軍必謂見伐當重兵
潼關其勢然也若凌威長驅臣實見其未易若輿駕頓
錐則不足上勞聖躬如此則進退之機宜在熟慮賊不
敢乘勝過陝遠懾天威故也今盡用兵之竿事從屈伸
遣師撲討而南夏清宴賊方懼將來永不敢動若輿駕
造錐而反凶醜更生揣量之心必啓邊戎之患此既必
然江南顛顛注輿駕忽聞遠伐不測之淺深必以殿下
太申威靈未還人情恐懼事又可推往年西征劉鍾危

始前年劫盜破廣州人士都盡三吳心腹之內諸縣屢
敗皆由勞役所致又聞處處大水加遠師民弊至於敗
散自然之理殿下在彭城劫盜破諸縣事非偶爾皆是
無賴凶慝凡順而撫之則百姓思安違其所願必為亂
矣古人所以救其煩穢正在於斯漢高身困平城呂后
受匈奴之辱魏武軍敗赤壁宣武喪師枋頭神武十功
無所一損况偏師失律無虧於廟堂之上者耶即之事
實非敗之謂唯齡石等可念耳若行也或速其禍反覆

思惟愚謂不煩殿下親征小劫西虜或為河雒之患今
正宜通好北邊則河南安河南安則濟泗靜伏願聖鑒
察臣愚懷

范泰為散騎常侍景平初致仕少帝在位多諸愆失泰
上封事極諫曰伏聞陛下時在後園頗習武備鼓鼙在
宮聲聞於外黠武掖庭之內諠譁省闈之間不聞將帥
之臣統御之主非徒不足以威四夷祗生遠近之恠近
者東寇紛擾皆欲伺國瑕隙今之吳會軍過二漢關河

根本既搖于何不有水旱成災役夫不息無寇而戒
為費漸多河南非復國有羯衆難以理期此臣所用忘
寢食而干非其位者也陛下踐祚委政宰臣實同高宗
諒闇之美而更親狎小人不免近習懼非社稷至計經
世之道王言如絲其出如綸下觀而化疾於影響伏願
陛下思弘古道式遵遺訓從理無滯任賢無疑如此則
天下歸德宗社惟永書云一人有慶兆民賴之天高聽
卑無幽不察興衰在人成敗易曉未有治政在於上而

人亂於下者也臣蒙先朝過遇陛下殊私實欲盡心竭誠少報萬分而惜耄已及百疾互生便為永違聖顏無復自盡之路貪及視息陳其狂瞽陛下若能哀其所請留心覽察則臣夕隕於地無恨九泉少帝雖不能納亦不加譴元嘉二年遂輕舟遊東陽時太祖雖當陽親覽而徐羨之等猶秉重權恭復上表曰伏承廬陵王已復封爵猶未加贈陛下孝慈天至友于過隆伏揆聖心已自有在但司契以不唱為高冕旒以因寄成用臣雖言

不足採誠不亮時但猥蒙先朝忘醜之眷復沾廬陵矜
顧之末息晏委質有兼常款契濶戎陣顛隕艱危厚德
無報授令路絕此老臣兼不能自己者也朽謝越局無
所逃刑恭諸子林宗之表竟不奏

張約之堂邑人前為吉陽令廬陵王義真既為徐羨之
等所廢約之上疏諫曰臣聞仁義之在天下若中原之
有菽理之感被萬物固不繫於貴賤是以考叔反悔誓
於及泉壺關復寃寃於湖邑也當斯之時豈無尊卿賢

輔哉或以事迫心違或以道壅謀屈何嘗不願聞善於
輿隸糞藥石於阿氏哉臣雖草芥備充黔首少不量力
頗高殉義之風謂蹈善於朝聞愈徒生於白首用敢干
禁忘戮披叙丹愚伏惟高祖武皇帝誕茲神武撫運龍
興仰清天步則齊德有虞俯廓九州則侔功大夏故虔
順天人享有萬國雖靈祚修長聖躬弗永陛下繼明紹
統遐邇一心藩王哲茂四維寧謚傾耳康哉之詠企踵
升平之風竊念廬陵王少蒙先皇優慈之過長受陛下

穆愛之恩故在心必言所懷必亮容犯臣子之道致招
驕恣之愆至於天資夙成寔有卓然之美宜在容養錄
善掩瑕訓盡義方進退以漸今猥加剝辱幽徙遠郡上
傷陛下棠棣之篤下令遠近愜然失圖士庶杜口人為
身計臣伏思大宋之興雖協應符緯而開基造次根條
未繁宜廣樹藩戚敦睦以道使兄弟之美比輝魯衛龜
策告同祚均七百豈不善哉陛下富於春秋慮未重復
忽安危之遠算肆不忍於一朝特願留神九思重加詢

採上考前代興亡之由中存武皇締構之業下顧蒼生
顯顯之望特開曲宥反王都邑選保傅於舊老求四友
於髦俊引誘情性導達聰明凡人在苦皆能自厲况王
質朗心聰易加訓範且中賢之人未能無過過貴自改
罪願自新以武皇之愛子陛下之懿弟豈可以其一眚
長致淪棄哉謹昧死詣闕伏地以聞惟願丹誠一經天
聽退就斧鑕無愧地下矣書奏以約之為梁州府叅軍
尋又見殺

何尚之為尚書右僕射時文帝行幸還多侵夕尚之表
諫曰萬乘宜尊重不可輕此聖心所鑒豈假臣啓輿駕
比出還多冒夜群情傾懼寔有未寧清道而動帝王成
則古今深戒安不忘危若值汲黯辛毗必將犯顏切諫
但臣等碌碌每存順默耳伏望少採愚誠思垂省察以
慰四海之望優詔納之

扶令育為龍驤奉軍時彭城王義康出鎮豫章令育詣
闕上表曰蓋聞哲王不逆切旨之諫以博聞為道人臣

不忌穢夷之罰以盡言為忠是故周昌極諫馮唐面折
孝惠所以克固諸嗣魏尚所以復任雲中彼二臣豈好
逆主干時犯顏違色者哉又袁盎之諫孝文曰淮南王
若道遇疾死則陛下有殺弟之名奈何文帝不用追悔
無及臣草莽微臣竊不自揆敢抱葵藿傾陽之心仰慕
周易匪躬之志故不遠千里願言命侶謹貢丹愚希垂
察納伏惟陛下躬執大象首出萬物王化咸通三才必
理闡天人之路開大道之門搜殊逸於巖穴招奇英於

側陋窮谷無白駒之唱喬岳無遺賢之嗟羅飛翮於垂
天網沉鱗於溟海況於彭城王義康先朝之愛子陛下
之次弟哉一旦出削遠送南垂恩絕於內形隔於遠取
離明主身放聖朝草萊黔首皆為陛下痛之臣惟景平
元嘉之釁幾於危殆三公託以興廢之宜密懷不臣之
計台輔伺隙於京甸強楚闖關於上流或苞惡而窺國
或顯逆而凌主有生之所惴恐神祇之所忿忌也賴宗
社靈長廟筭流遠灑滌塵埃殄馘醜類氛霧時靖四門

載清肅之時義康豈不願忝皇謀均比休咎哉且陛下
舊楚飛勝非親勿居遂以驃騎之號任以藩夏之重撫
政南郢綏民遏寇播皇宗之澤以治幽荒陛下之潤被
之九有豈有南荆之民沾渥而已焉遂召之以宰輔又
宰之以和味既居三事又牧徐揚所以幽顯齊歎人神
同忭莫不言陛下授之為得義康受之為是也今如何
信疑貌之似闕兄弟之恩乎若有迷謬之愆可責之罪
正可數之以善惡導之以義方且廬陵王往事足以知

今此乃陛下前車之殷鑒後乘之靈龜也夫曾子之不
殺人雖二告而猶織仁主之令範也故詩云無信人之
言人實不信又云兄弟雖閔不廢親也尚書曰克明峻
德以親九族九族既睦可以親兄弟安可棄乎臣伏願
陛下上尋往代黜廢之禍下惟近者讒言之釁廬陵王
既申冤魂於后土彭城王亦弭疑愆於宋京此非徒皇
代當今之計乃蓋良史萬世之美也且諂諛難辨是非
易黷福始禍先古人之所畏故愛身之士身為已計莫

不結舌杜口孰肯冒忌干主哉臣以頑昧獨獻微管所以勤勤懇懇必訴丹誠者寔恐義康年窮命盡奄忽於南遂令陛下有棄弟之責臣雖微賤竊為陛下羞之况書言記事之史豈能屈典謨而諱哉脫於臣慮陛下恨之何益揚子雲云獲福之大莫先於和穆遘禍之深莫過於內難每服斯言以為警戒矧今親王室大事豈得韜筆默爾而已哉臣將恐天下風靡離間是懼遂令宇內遷觀民庶革心欲致康哉實為難也陛下徒云惡枝

之宜伐豈悟伐柯之傷樹乃往古之所悲當今所宜改也陛下若蕩以平聽屏此猜情垂訊蒞莠之謀曲察狂瞽之計一發非意之詔逮訪博古之士速召義康返於京甸兄弟協和君臣輯穆息宇內之機絕多言之路如是則四海之望塞讒說之道消矣何必司徒公揚州牧然後可以安彭城王哉若臣所啓違憲於國為非請即伏誅以謝陛下雖復分形赴鑊煮體烹屍始願所甘豈不幸甚表奏即收付建康獄賜死

蔡興宗為侍中時孝武新年拜陵興宗負璽陪乘及還帝欲因以射雉興宗正色曰今致虔國陵情敬兼重從禽猶有餘日請待他辰帝大怒遣令下車用是失旨

張邵為世子中軍叅軍十四年武帝以世子鎮荊州邵諫曰儲貳之重四海所繫不宜處外敢以死請從之

梁郭祖深為後軍叅軍時武帝溺情內教朝政縱弛祖深輿襯詣闕上封事其略曰大梁應運功高百王慈悲既引憲律如替愚輩因識悖慢斯作各競奢侈貪穢遂

生頗繇陛下寵勲太過馭下太寬故廉潔者自進無途
貪苛者取入多徑直弦者淪溺溝壑曲鈎者升進重沓
飾口利辭競相推薦訥直守信坐見埋沒勞深勲厚福
賞未均無功側入反加寵擢昔宋人賣酒惡犬致酸陛
下之犬其甚矣哉臣聞人為國本食為人命故禮曰國
無六年之儲謂非其國也推此而言農為急務而郡縣
苛暴不加勸獎今年豐歲稔人猶有饑色設遇水旱何
以救之陛下昔歲尚學置立五館行吟坐詠誦聲溢於

境比來慕法普天信向家家齋戒人人懺禮不務農桑
空談彼岸夫農桑者今日濟育功德者將來勝因豈可
墮本勤末置交効賒也今商旅轉繁遊食轉衆耕夫日
少犁軸日空陞下若廣興屯田賤金貴粟勤農桑者擢
以階級情耕織者告以明刑如此數年家給人足廉讓
則可生君子小人智計不同君子志於道小人謀於利
志於道者安國濟人志於利者損物圖己逆惡者害國
小人也忠良者捍國君子也臣見疾者詣道士則勸奏

章僧尼則令齋講俗師則鬼禍須解醫診則湯熨散丸
皆先自為也臣謂為國之本與療病相類療病當去巫
鬼尋華扁為國當黜佞邪用管晏今之所任腹背之毛
耳論外則有勉捨徐勉周捨也說內則有雲昊范雲也昊失其姓雲

昊所議則傷俗盛法勉捨之志唯願安枕江東主慈
臣怯息謀外旬使南中士女南望懷寃若賈誼重生豈
不慟哭臣今直言犯顏罪或容宥而乖忤貴臣則禍在
不測所以不憚鼎鑊區區必聞者正以社稷計重而螻

蟻命輕使言入身滅臣何所恨夫謀臣良將何代無之
貴在見知要在用耳陛下皇基兆運二十餘載臣子之
節諫諍是誰執事皆同而不和答問唯唯而已入對則
言聖旨宸衷出論則云誰敢逆耳過實在下而謫見於
上遂使聖皇降誡躬自引咎宰輔晏然曾無謙退且百
僚卿士渺有奉公尸祿競利不尚廉潔累金積鏹侍列
如仙不田不商何因而爾法者人之父母惠者人之仇
讎法嚴則人思善德多則物生惡惡不可長欲不可縱

伏願去貪濁進廉平明法令嚴刑罰禁奢侈薄賦歛則天下幸甚謹上封事二十九條伏願抑獨斷之明少察愚瞽時帝大引釋典將以易俗故祖深尤言其事條以爲都下佛寺五百餘所窮極寵麗僧尼十餘萬貫資產沃壤所在郡縣不可勝言道人又有白從尼則畜養女皆不貫人籍天下戶口幾亡其半而僧尼多畜養女皆服羅紈其蠹俗傷法抑由於此請精加簡括若無道行四十已下皆使還俗附農罷白從養女聽畜奴婢唯著

青布衣僧尼皆命蔬食如此則法與俗盛國富人殷不然恐方來處處成寺家家剃落尺土一人非復國有朝廷擢用勲舊為三郟州郡不顧御人之道唯以貪殘為務迫脅良善害甚豺狼江湘人庶尤受其弊自三關以外是處遭毒而此勲人投化之始但有一身被及任用皆募部曲而揚徐之人逼以衆役多投其募利其貨財皆虛名上簿送出三津名在遠役身歸鄉里又懼本屬簡問於是逃亡他境僑戶之興良由此故又梁興已來

發人征役號為五三及投募將營主將無恩在郵失理
多有物故輒利叛亡或有身殞戰場而名在叛目符下
討捕稱為逋叛錄質家丁合家又叛則取同籍同籍又
叛則取比伍比伍又叛則望村而取一人有犯則合村
皆空雖肆箠時降蕩滌惟始而監符猶下舊日限以嚴
程上任信下轉相督促臺使到州州又遣押使至郡州
郡競急切同趣下城令宰多庸才望風畏伏於是斂戶
課薦其箱使人納重貨許立空文有百里微欲矯俗則

嚴科立至自是所在恣意貪利以事上官又請斷界首將生口入比及關津廢替須加糾擿又言廬陵年少不宜鎮襄陽左僕射上矐在喪被起為吳郡曾無辭讓其言深刻又請復郊四星帝雖不能恣用然嘉其直擢為豫章鍾陵令員外散騎常侍

蕭介為光祿大夫太清中侯景於渦陽敗走入壽陽高祖勅常防默納之介聞而上表諫曰臣抱患私門竊聞侯景以渦陽敗績隻馬歸命陛下不悔前禍復勅容納

臣聞凶人性不移天下之惡一也昔呂布殺丁原以事
董卓終誅董而為賊劉牢之反王恭以歸晉還背晉以
構妖何者狼子野心終無馴狎之性養獸之喻必見饑
噬之禍侯景獸心之種鳴鏑之類以凶狡之才荷高歡
翼長之遇位忝台司任居方伯然而高歡墳土未乾即
還反噬逆力不逮乃復逃死關西宇文不容故復投身
於我陛下前者所以不遠細流正欲以屬國降人以討
匈奴冀獲一獸之効耳今既亡師失地真是境上之匹

夫陛下愛匹夫而棄與國之好臣竊不取也若國家猶望其高鳴之晨歲暮之効臣竊惟侯景必非歲暮之臣棄鄉國如脫屣背君親如遺芥豈知遠慕聖德為江淮之淳臣事跡顯然無可致惑一隅尚且如此觸類何可具陳臣朽老疾侵不應輒干朝政但楚襄將死有城郢之患衛魚臨亡亦有屍諫之節臣忝為宗室遺老敢忘劉向之心伏願天慈少思苦口之語高祖省表歎息卒不能用

陳章華禎明初上書極諫其大略曰昔高祖南平百越
展拓疆宇世祖東定吳會西破王琳高宗克復淮南辟
地千里三祖之功亦至勤矣陛下即位於今五年不思
先帝之艱難不知天命之可畏溺於嬖寵惑於酒色祠
七廟而不出拜妃嬪而臨軒老臣宿將棄之草莽諂佞
讒邪昇之朝廷今疆場日蹙隋軍壓境陛下如不改弦
易轍臣見麋鹿復遊於姑蘇矣書奏後主大怒即日命
斬之

後魏崔浩為祭酒神瑞二年秋穀不登太史令王亮蘇
垣因華陰公等言讖書國家當治鄴應大樂五十年勸
明元遷都浩與時進周澹言於明元曰今國家遷都於
鄴可救今年之饑非長久之策也東州之人嘗謂國家
居廣漠之地民畜無崖號稱牛毛之衆今留守舊都分
家南徙恐不滿諸州之地叅居郡縣處榛林之間不便
水土疾疫死傷情見事露則百姓意沮四方聞之有輕
侮之意屈丐蠕蠕必提挈而來雲中平城則有危殆之

慮阻隔常有千里之險雖欲救援赴之甚難如此則聲實俱損矣今居北方假令山東有變輕騎南出耀威桑梓之中誰知多少百姓見之望塵震服此是國家威制諸夏之長策也至春草生乳酪將出兼有菜菓足接來秋若得一熟事則濟矣帝凜然之曰唯此二人與朕意同復使中貴人問浩澹曰今既餬口無以至來秋或復不熟將如之何浩等對曰可簡下窮乏戶諸州就穀若來秋無年願更圖也但不可遷都帝從之於是分民詣

山東三州就食出倉穀以廩之來年遂大熟賜浩澹妾各一人御衣一襲絹五十疋綿五十斤

高允為中書侍郎給事中熟善明性多機巧欲逞其能勸文成大起宮室允諫曰臣聞太祖道武皇帝既定天下始建都邑其所營立必因農隙不有所興今建國已久宮室已備永安前殿足以朝會萬國西堂温室足以安御聖躬紫樓臨望可以觀望遠近若廣修壯麗為異觀者宜漸致之不可倉卒計斫材運土及諸雜役須二

萬人丁夫充作老小供餉合四萬人半年可訖古人有
言一夫不耕或受其饑一婦不織或受其寒况數萬之
衆其損廢亦以多矣推之於古驗之於今必然之効也
此誠聖心所宜思量帝納之

張白澤為壅州刺史時獻文詔諸監臨之官所監治受
羊一口酒一斛者罪至大辟與者以坐論糾告得尚書
以下罪狀者各隨所糾官輕重而授之白澤上表諫之
曰伏見詔書禁尚書已下受禮者刑身糾之者代職伏

惟三載考績黜陟幽明斯乃不易之令軌百王之通式
今之都曹古之公卿也皆挾美萬機讚微百揆風化藉
此而平治道由茲而穆且周之下士尚有代耕況皇朝
責任而服勤無報豈所謂祖述堯舜憲章文武者乎羊
酒之罰若行不已臣恐姦人闕望忠臣懈節而欲使事
靜民安治清務簡至於委任責成不亦難辦如臣愚量
謂依律令舊法稽同前典班祿酬廉羊去亂羣常刑無
赦苟能如此則升平之軌朞月可望刑措之風三年必

致矣獻文納之後為雍州刺史大和初懷州民依祁苟
初三十餘人謀反將殺刺史文明皇后欲盡誅一城之
民白澤諫曰臣聞上天愛物之生明王重民之命故殺
一人而取天下仁者不為且書云父子兄弟罪不相及
今群凶肆虐輓裂誅盡合城無辜奈何極辟不誣十室
而况一州或有忠焉或有仁者若濫刑濫及殺忠與仁
斯乃西伯所以歎息於九侯孔子所以迴輪於河上伏
惟聖德昭明殷鑒永諳前禮止迅烈之怒抑雷霆之威

則溥天知幸矣昔厲防民口卒滅宗姬文聽輿頌終推
強楚願不以人廢言留神省察太后從之

陸馥為選部尚書獻文將禪位於京兆王子推任城王
雲隴西王原賀等並皆固諫馥抗言曰皇太子聖德承
基四海屬望不可橫議干國之紀臣請刎頸殿庭有死
無貳久之帝意乃解詔曰馥直臣也其能保吾子乎遂
以馥為太保與太尉源賀持節奉皇帝璽綬傳位於

孝文

李冲為侍中孝文南伐加冲輔國大將軍統衆翼從自發大都至於雒陽霖雨不霽仍詔六軍發軫孝文戎服執鞭御馬而出群臣稽顙於馬首之前帝曰長驅之謀廟筭已定今大將軍運公等更欲何云冲進曰臣等不能折衝帷幄坐制四海而令南有竊號之渠寔臣等之咎陛下以文軌未一親勞聖駕臣等誠思亡軀盡命効死戎行然自京都淫雨士馬困弊前路尚遙水潦方甚且伊雒境內水小猶尚致難况長江浩汗越在南境若

營舟楫必須停滯師老糧乏進退為難矜喪反旆於義
為允帝曰一同之意前已具論卿等正以水雨為難然
天時頗亦可知何者夏既炎旱秋固雨多去冬之初必
當開爽比後十月間若雨猶不已此乃天也脫於此而
晴行則無害古不伐喪謂諸侯同軌之國非王者統一
之文已至於此何容停駕冲又進曰今者之舉天下所
不願唯陛下欲之漢文言吾獨乘千里馬竟何至也臣
有意而無其辭敢以死請帝大怒曰方欲經營宇宙一

同區域而卿等儒生屢疑大計斧鉞有常卿勿復言策
馬將出於是大司馬安定王休兼左僕射任城王澄等
並殷勤泣諫帝乃喻以遷都洛陽之意遂南伐

崔挺為光州刺史時以犯罪配邊者多有逃越遂立重
制一人犯罪逋亡合門充役挺上書以為周書父子罪
不相及天下善人少惡人多以一人犯罪延及合門司
馬牛受桓魋之罰柳下惠嬰盜跖之誅豈不哀哉辭甚
雅切孝文納之

成淹為謁者僕射以遷都與家累至雒陽行次靈丘屬南齊遣使勅驛馬徵淹車駕濟淮淹於路左請見孝文竚駕而進之淹曰蕭鸞悖逆幽明同棄陛下俯應人神按見江涘然敵不可小蜂蠆有毒而況國乎深願聖明保萬全之策詔曰前車之轍得不慎乎淹曰伏聞發雒已來諸有諫者解官奪職恐非聖明納下之義帝曰此是我命耳卿不得干於斧鉞淹曰昔文王詢於蒞菑晉文聽輿人之誦臣雖卑賤敢同匹夫帝優而容之詔賜

絹百疋

高道悅為諫議大夫兼御史中尉留守雒京時宮極初
基廟庫未構孝文將水路幸鄴已詔都水迴營構之才
已造舟楫道悅表諫曰臣聞博納輿言君上之崇務歲
規輔正臣下之誠節是以置鼓設榜爰自曩日虛襟博
聽義屬今辰臣既踈魯濫蒙榮貴司兼獻弼職當然否
佩遇恩華願陳聞見竊以都作營構之材部別科擬素
有定所工治已訖迴付都水用造舟艦闕永固居宇之

功作暫時遊嬉之用損耗殊倍終為棄物且子來之誠
本期營起今不修繕舟楫更為非務公私徇惶僉深怪
愕又欲御泛龍舟經由右齊其沿河挽道久以荒蕪舟
楫之人素不便習若欲委棹正流深薄之危古今共慎
若欲挽牽取進授衣之月裸形水陸恐乖視人若子之
義且艱維相望陸路平直時乘沃若往來匪難更乃捨
周道之安即涉川之殆此乃愚智等慮朝野俱惑進退
伏思不見其可又從駕群僚聽將妻累舟楫之間更無

限隔士女雜亂內外不分當今景御休明惟新式度又
氏羗犯順玉帛未恭西戎內侵介冑仍襲南寇紛擾對
接近畿蠻民踈戾每造不軌闕闕間隙或生慮外愚謂
應妙選懿親撫寧後事今姦回息覲覲之望邊寇絕闕
疆之心臣稟性愚直知而無隱區區丹衷冒昧以聞詔
曰省所上事深見乃心但卿之立言半非矣當須陳非
以示謬稱是以彰德然後明所以而不用有由而為之
不爾則未相體耳迴材都水暫營嬉遊終為棄物修繕

非務舟楫無限士女雜亂此則卿之失辭矣深薄之危
撫後之重斯則卿之得言也於是孝文遂從陸路

盧淵為散騎常侍孝文議伐齊淵表曰臣誠識不周覽
頗尋篇籍自晉以前承平之世未有皇輿親御六軍決
勝行陣之間者勝不足為武弗勝有虧威德明千鈞之
弩不為鷁鮑發機故也昔魏武以熒卒一萬而袁紹土
分胡銳以步兵三千而苻軍瓦解勝負不由衆寡成敗
在於須臾若用田豐之謀則坐制並德矣

並德張飛字

魏既

并蜀迄於晉世分有江水居其上流大小勢殊德政理
絕然猶君臣協謀垂數十載孫皓暴戾上下雋爽水陸
俱進一舉始克今蕭氏以篡弒之燼政虐役繁又支屬
相屠人神同棄吳會之民延踵皇澤正是齊軌之期一
同之會若大駕南巡必左衽革面閩越倒戈其猶運山
壓卵有征無戰然愚謂萬乘親戎轉漕難繼千里饋糧
士有饑色大軍之後必有凶年不若命將簡銳盪滌江
右然後鳴鑾巡省告成東岳則天下幸甚率土戴賴臣

又聞流言關右之民自比年以來競設齋會假稱豪貴以相扇惑顯然於衆坐之中以謗朝廷無上之心莫此之甚愚謂宜速懲絕其魁帥不爾懼成黃巾赤眉之禍育其微萌而不詔之毫末斧斤一加恐蹈害者衆臣世奉皇家義均休戚誠知干忤之愆寔深然不忠之罪莫大詔曰至德雖一樹功多途三聖殊文五帝異律或張或弛豈必相因遠惟承平之主所以不親旆五戎者蓋有由矣英明之主或以同軌無征守庸之君或志在侵

伐今若喻之英皇時非昔類比之庸后意有惑焉脫元極之尊本不宜駕二公之徙革輅之義寧非焉且曹操勝袁蓋由德義內舉符堅瓦解當緣立政未至定非弊卒之力強一萬之衆寡也今則驅先天之駕用仁義之師當審觀成敗庶免斯咎長江之阻未足可憚踰紀之略亦復何尚洞庭彭蠡竟殷固奮臂一呼或成漢業經略之義當付之臨機足食之籌望寄之蕭相將希混一豈好輕動利見之事何得委人也又水旱之運未必由

兵堯湯之難詎因興旅頗豐之後雖靜有之闕左小紛
已勅禁勒流言之細曷足以紆大功深錄誠心勿恨不
相遂耳

陸叡為尚書令太和十九年叡表曰臣聞先天有弗違
之略後天有順時之規今蕭鸞盜有名目竊據江左惡
盈罪稔天人棄之取亂攻昧誠在茲日愚以長江浩蕩
彼之巨防可以德招難以力屈南土昏霧暑氣鬱蒸師
人經夏必多疾病而鼎遷草荆庶事甫爾臺省無論政

之館府寺靡聽治之所百寮居上事等行路沉雨炎陽
自成癘疫且兵徭並舉聖王所難今介冑之士外攻讎
寇羸弱之夫內勤土木運給之費日損千金驅罷軟之
兵討堅城之虜將何以取勝乎陛下往冬之舉正欲耀
武江漢示威衡湘自春幾夏理宜釋甲願橐旌卷旆為
持久之方崇成帝居深重本之固聖懷無內念之虞兆
庶休斤板之役循理華區觀風雒浦然後簡英略之將
任猛毅之雄南取荆襄據其要府則梁秦以西覩機自

服撫附振威白麾東指則義陽以左四聲可制然後布
仁化以綏近播恩施以懷遠凡在有情孰不思奮還遣
慕德之人效其餘力乘流而赴勢勝萬倍最爾閩區敢
不稽顙豈必茲年競斯寸尺惟願固存近勅納降而馳
不紆鑿輿久臨炎暑帝從之旋

崔光為太常卿宣武正始元年夏有典事史元顯獻四
足四翼雞詔散騎侍郎趙邕以問光光表答曰臣謹按
漢書五行志宣帝黃龍元年未央殿路軫中雌雞化為

雄毛變化而不鳴不將

將謂率領其群也

無距元帝初元中

丞相府史家雌雞伏子漸化為雄冠距鳴將永光中有

獻雄雞生角割向以為雞者小畜主司時起居

至時而鳴

以為人起居之節

小臣執事為政之象也言小臣將乘君威以

害政事猶若顯也竟寧元年石顯伏辜此其效也靈帝

光和元年南宮寺雌雞化為雄一身毛皆似雄但頭冠

尚未變詔以問議郎蔡邕對曰貌之不恭則有雞禍

臣竊推之頭為元首人君之象也今雞一身已變未至

於頭而上知之是將有其事而不遂成之象也若應之
不精政無所改頭冠或成為患滋大是後張角作亂稱
黃巾賊遂破壞四方疲於賦役民多叛者上不改遂至
天下大亂今之難狀雖與漢不同而其應頗相類矣向
邕並博達之士考物驗事信而有證誠可畏也臣以邕
言推之翅足衆多亦群下相扇助之象雖而未大脚羽
差小亦其勢尚微易制御也臣聞災異之見皆所以示
吉凶明君觀之而懼乃能招福闇主視之彌慢所用致

禍詩書春秋秦漢之事多矣此陛下所觀者也今或有
自賤而貴關預政事殆亦前代君房之匹此者南境死
亡千計白骨橫野存有酷恨之痛歿為怨傷之魂義陽
屯師盛夏未反荆蠻狡猾征人淹次東州轉輸往多無
還百姓困窮絞縊以殞北方霜降蠶婦輟事羣生憔悴
莫甚於今此亦賈誼哭歎谷永劫諫之時司寇行戮君
為之不舉陛下為民父母所宜矜卹國重戎戰用兵猶
火內外恐怨而易以亂離陛下縱欲忽天下豈不仰念

太祖取之艱難先帝經營劬勞也誠願陛下留聰明之
鑒警天地之意禮處左右節其貴越往者鄧通董賢之
盛愛之正所以害之又躬饗加罕晏宗或闕時應親肅
郊廟延敬諸父簡訪四方務加休息爰發慈旨撫鎮貧
瘠簡費山池減徹聲妓晝存政道夜以安身博採芻蕘
進賢出佞則兆庶幸甚妖弭慶集矣宣武見之大悅後
數日而茹皓等並以罪失伏法於是光愈重正始二年
八月光表曰二十八日有物出於太極之西序勅以示

臣臣按其形即莊子謂蒸成菌者也又云朝菌不知晦朔雍門周所稱磨蕭芥而伐朝菌皆指言蒸氣鬱長非有根種柔脆之質彫殞速易不言旬月無擬芥斤又多生墟落穢濕之地罕起殿堂高華之所今棟宇崇麗墻築工密糞朽弗加沾濡不及而茲菌歟構屨狀扶踈誠足異也夫野木生朝野鳥入廟古人以為敗亡之象然懼災修德者咸致休慶所謂家利而怪先國興而妖豫是故桑穀拱庭太戊以昌雉雉集鼎武丁用熙自比鴈

鵲巢於廟殿梟服鳴於宮寢菌生賓階軒坐之正准諸
往記信可為誠且東南未靜兵革不息郊甸之內大旱
跨時民勞物悴莫此之甚承天子育者所宜矜恤伏願
陛下追殷二宗感變之意側躬聳誠惟新聖道節夜飲
之忻強朝御之膳養方富之年保金玉之性則魏祚可
以永隆皇壽等於山岳為中書令永平元年秋將刑元
愉妾李氏群官無敢言者勅先為詔光遂巡不作奏曰
伏聞當刑元愉妾李加之屠割妖惑扇亂誠合此罪但

外人竊云李今懷妊例待分產且臣尋諸舊典兼推近
事裁至割胎謂之虐刑桀紂之主乃行斯事君舉必書
義無隱昧酷而非法何以示後陛下春秋已長未有儲
體皇子襁褓至有天失臣之愚識知無不言乞停李獄
以俟育孕宣武納之

李平為河南尹宣武將幸鄴平上表諫曰伏見已丑詔
書雲軒鑾輅行李有期鳳服龍駟鹽梅相濟初翼云
叔向之賢可及世而康不免其身寔可嗟惜未幾康除

龍驤將軍平州刺史高謙之為河陰令舊制二縣令得
面陳得失時佞幸之輩惡其有發聞遂共罷奏謙之乃
上疏曰臣以無庸謬宰神邑實思奉法不撓稱是官方
酬朝廷無貲之恩盡人臣守器之節但豪家支屬戚里
親媾縲紲所及舉目多是皆有盜憎之色咸起怨上之
心縣令輕弱何能克濟先帝昔發明詔得使面陳所懷
臣亡父先帝臣崇之為雒陽令常得入奏是非所以朝
貴斂手無敢干政近日以來此制遂寢致使神宰威輕

下情不達今二聖遠遵堯舜憲章高祖愚臣亦望策其
駑蹇少立功名乞親舊典更明往制庶姦豪知禁頗自
屏心詔曰此啓深會朕意付外量聞謙之又上疏曰臣
聞夏德中微少康成克復之主周道將廢宣王立中興
之功則知國無常安世無常弊唯在明主所以變之有
萬化之道耳自正光已來邊城屢擾命將出師相繼於
路軍費戎資委輸不絕至如弓格賞募咸有出身槩刺
斬首又蒙階級故四方壯士願征者多各各為己公私

兩利若使軍柄付得其人賞勲不失其實則何賊不平
何征不捷也諸守帥或非其才多遣親者妄稱入募別
倩他人引弓格鬪虛受征官身不赴陣唯遣奴客充數
而已對寇臨敵曾不彎弓則是正爵虛加征夫多闕賊
虜何可殄除忠良何以勸誠也宜近習侍臣歲屬朝士
請託官曹擅作威福如有清身奉法不為回者咸共譖
毀橫受罪罰在朝顧望誰肯申聞蔽上壅下虧風敗政
使讒諂甘心忠謹息議況且頻年以來多有徵發民不

堪命動致流離苟保妻子競逃王役不復顧其桑井憚
此刑書正由還有必困之理歸無自安之路若聽歸其
本業徭役微甄則還者必衆墾田增闢數年之後大獲
課民今不務以理還之但欲嚴符切勒臣恐數年之後
走者更多安業無幾故有國有家者不患民心不歸唯
患政之不立不恃敵不我攻唯恃吾不可侮此乃千載
共遵百王一致且琴瑟不韻知音改弦更張駢駘未調
善御執轡成組諺云迷而知反得道不遠此言雖小可

以喻大陸下一日萬幾事難周攬元凱結舌莫肯明言
臣雖庸短世受榮祿竊慕前賢匪躬之義不避斧鉞之
誅以希一言之益伏垂覽察略加推採使朝章重舉軍
威更振海內起惟新之歌天下見復禹之績則臣奏之
後笑入下泉靈太后得其䟽以責左右近侍寵要者由
是疾之乃啓太后云謙之有學藝宜在國學以訓胄子
詔從之除國子監博士

孫紹為右軍將軍久之為徐兗和糴使還朝大陳軍國

利害不報紹表曰臣聞文質相用治道以之緝熙汗隆
得時人物以之通濟故能事恢三靈仁治九服伏惟陛
下應靈踐祚中明昭物宰輔忠純伊霍均美既致昇平
之基應成無為之業而漠北叛命隴右寇逆中州驚擾
民庶竊議其故何哉皆由上法不通下情怨塞故也臣
雖愚短具鑒始末往在代都武質而治安中京以來文
濟而政亂故臣昔於大和極陳得失具論四方華夷心
動高祖垂納又應可尋延昌正光奏疏頻上主者收錄

不蒙報問即日事勢乃至於此盡微臣豫陳之驗今東南有僭號之豎西北有逆命之寇豈得怨天實尤人矣臣今不憂荒外正慮中畿急須改張以寧其意若仍持疑變亂尋作肘腋一乖大事去矣然臣奉國四世欣感是同但職在冗散不關樞密寧濟之計欲陳無所可謂經緯甚多無機可織夫天下者大器也一正難傾一傾難正當今之危躡足之急臣備肉食痛心無已泣血上陳願垂採察若得言參執事獻可替否寇逆獲除社稷

稱慶雖死如生犬馬情畢紹性抗直每上封事常至懇
切不憚犯忤但天性踈脫言乍高下時人輕之不見採
納

張普惠為諫議大夫表論時政得失一曰審法度平斗
尺調租務輕賦役務省二曰聽輿言察怨訟先皇舊事
有不便於政者請悉追改三曰進忠謇退不肖任賢勿
貳去邪勿疑四曰興滅國繼絕世勲親之裔所宜收叙
書奏孝明靈太后引普惠於宣光殿隨事難詰延對移

時令曰寧有先皇之詔一時翻改普惠僂佹不言令曰
卿似欲致諫故以左右有人不肯苦言朕為卿屏左右
卿其盡陳之對曰聖人之養庶物愛之如傷况今二聖
纂承洪緒妻承夫子承父夫父之不可安然仍行豈先
帝傳委之本意仰惟先帝作事或有司之謬或權時所
行在後以為不可者皆追而正之聖上忘先帝之自新
不問理之伸屈一皆抑之豈蒼生黎庶所仰望於聖德
太后曰小小細務一一翻動更成煩擾普惠曰聖上之

養庶物若慈母之養赤子幾臨危壑將赴水火以煩勞而不救豈赤子所望於慈母太后曰天下蒼生寧有如此苦事普惠對曰天下之親懿莫重於太師彭城王然遂不免枉死微細之苦何可得無太后曰彭城之苦吾已封其三子何足復言普惠曰聖后封彭城之三子天下莫不欣然至德知慈德之在上臣所以重陳者凡如此枉乞垂聖察太后曰卿云興滅國繼絕世滅國絕世竟復誰是普惠對曰昔淮南逆終漢文封其四子蓋骨

肉之不可棄親親故也竊見故太尉咸陽王冀州刺史
京兆王乃皇子皇孫一德之虧自貽悔戾沉淪幽壤緬
焉弗收豈是興滅繼絕之意乞收葬二王封其子孫愚
臣之願太后曰卿言有理朕深識之當命公卿博議此
事又靈太后父司徒胡國珍薨贈相國太上秦公普惠
以前世后父無太上之號詣闕上疏陳其不可左右畏
懼莫敢為通會聞胡家穿墻下聞有磐石乃密表曰臣
聞優名實位王者之所光錫尊君愛親臣子所以慎終

必使勲績相侔號秩相可然後能顯揚當時傳徽萬代者矣竊見故侍中司徒胡公懷道含靈寶誕聖后載育至尊母儀四海近樞克唯允之寄居槐體論道之明故以功餘九錫褒假鑿燾深聖上之加隆極慈后之至愛憲章天下不亦可乎而太上之號竊謂未衷何者易稱天尊地卑乾坤定矣故曰大哉乾元又曰至哉坤元明乾坤不可並大禮記曰天無二日民無二王嘗禘郊社尊無二上明君臣不可並上伏見詔書以司徒為太上秦

公夫人為太上秦君夫人蒙號於前司徒繫之於後尊光之美盛矣竊惟高祖受禪於獻文皇帝故仰尊為太上皇皆因上上而生名也皇太后稱今以繫勅下蓋取三從之道遠同文母列於十亂則司徒之為太上恐乖繫勅之意春秋傳曰葬稱公臣子辭明不可復加上也書曰茲予大饗於先王爾祖其從與饗之司徒位尊屬重必當配饗先朝稱太上以為臣以事太上皇恐非司徒翼翼之心漢祖創有天下尊父曰太上皇母曰昭靈

后乃帝者之事晉有小子侯尚曰僭之於天子司徒三公也其可同號於帝乎孔子曰必也正名乎名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足易曰有大者不可以盈故受之以謙謙尊而光卑而不可踰天道虧盈而益謙地道變盈而流謙鬼神害盈而福謙人道惡盈而好謙又困於上者必反於下故受之以井比尅吉定兆而以淺改卜羣心悲惋亦或天地神靈所以垂

至戒啓聖情伏願聖后迴日月之明察微臣之請停司
徒逼同之號從卑下不踰之稱畏困上之監邀謙光之
福則天下幸甚臣聞見災修德災變成善此太戊所以
興殷桑穀以之自滅况今卜遷方始當修革之會愚以
為無上之名不可假之脫譏於千載恐貽不言之咎且
君之於臣比葬三臨之禮也司徒誠為后父實人臣也
雖子尊不加於父乃天下母以義斷恩不可遂在室之
意故曰女子有行遠父母兄弟况乃應坤之載承天之

重而朔望於司徒之殯晨昏於郊墓之間雖聖思蒸蒸
其不虞宜戒離宸極之嚴居疲雲蹕於道路此於億兆
蒼生瞻仰失圖伏願尋載馳之不歸存靜方之光大則
草木可繁人靈斯穆臣職忝諫司敢獻狂瞽謹冒死上
聞不敢宣露乞垂省覽昭臣微款脫得奉謁聖顏曲盡
愚衷者死且不朽太后覽表親至國珍宅召集王公八
座卿尹及五品以上博議其事遣使召普惠與相問答
又令侍中阮乂中常侍賈燦監觀得失任城王澄問普

惠曰漢高祖作帝尊父為太上皇今聖母臨朝贈父太上公求之故實非為無據且君舉作則何必維舊對曰天子稱詔太后稱令故周臣十亂文母預焉仰思所難竊謂非正澄曰前代太后亦有稱詔聖母自欲存謙光之義故不稱耳何得以詔命之別而廢嚴父之孝對曰后父太上自昔未有前代母后豈不欲尊崇其親王何以不遠謨古義而近順今旨未審太后何故謙於稱詔而不謙於太上竊願聖后終其謙光太傅清河王懌曰

昔在僭晉褚氏臨朝殷浩遺褚裒書曰足下今之太上皇也况太上公而致疑對曰褚裒以女輔政辭不入朝

淵源譏其不恭

淵源殷浩字

故有太上之刺本稱其非不記

其是不謂殿下以此賜難侍中崔光曰張生表中引晉有小子侯出自鄭注非為正經對曰雖非正經之文然述正經之旨公好古習禮復同斯難御史中丞尉元康因謂崔光曰張表云晉之小子侯以號同稱僭今者太上公名同太上皇比晉小子義似相類但不學不敢辨

其是非普惠對曰中丞既疑其是不正其非豈所望於
三獨尚書崔亮曰諫議所見正以太上之號不應施於
人臣然周有太公尚父亦兼二名人臣尊重之稱固知
非始今日普惠對曰尚父者有德可尚太上者上中之
上名同義異此亦非並亮又曰古有文王武王亦有文
子武子然則太上皇太上公亦何嫌其同也普惠對曰
文武者德行之迹故迹同則謚同太上公者尊極之位
豈得通施於臣下廷尉少卿袁翻曰周官上公九命上

大夫四命命數雖殊同為上何必上者皆是極尊普惠
厲聲訶黷曰禮有上卿上士何止大夫與公但今所行
以太加上二名雙舉不得非極雕蟲小藝微或相許至
於此處豈卿所及黷甚有慚色默不復言任城王澄曰
諫諍之體各言所見至於用捨固在應時卿向答袁氏
聲何太厲普惠對曰所言若是宜見採用所言若非懼
有罪及是非須辨非為苟競澄曰朝廷開不諱之門以
廣忠言之路卿今意在向義何云乃虞罪罰議者咸以

太后當朝志相黨順遂奏曰張普惠辭雖不屈然非臣等所同漢汗已流請依前詔太后復遣阮乂賈燦宣令謂普惠曰朕向各卿與群官對議往復既終皆不同卿表朕之所行孝子之志卿之所陳忠臣之道群公已有成議卿不得苦奪朕懷後有所見勿得難言普惠於是拜令辭還初普惠被召傳詔馳驛驅馬來甚迅速佇立催去普惠諸子憂怖流涕普惠謂曰我當休明之朝掌諫議之職若不言所難言諫所難諫便是唯唯曠官尸

祿人生有死死得其所夫復何恨然朝廷有道汝輩勿
憂及議罷旨勞還宅親故賀其幸甚

元昭業為諫議大夫孝莊將畋雖南昭業叩馬諫止帝
避之而過



冊府元龜卷五百四十一